

BESTELAKO XEDAPENAK

HEZKUNTZA, HIZKUNTZA POLITIKA ETA KULTURA SAILA

1866

48/2015 DEKRETUA, apirilaren 14koa, «Dantzerti» Euskadiko Arte Dramatiko eta Dantza Goi Eskola sortzeko dena.

Hezkuntzari buruzko maiatzaren 3ko 2/2006 Lege Organikoan, berariaz tratatzen dira arte-irakas-kuntzak, eta 45. artikuluan xedatzen denez, dantzako goi-mailako ikasketak eta arte dramatikoko ikasketak goi-mailako arte-ikasketak dira. Aipatu legeak xede hau ematen die irakaskuntza horiei: ikasleei kalitateko prestakuntza artistikoa ematea eta etorkizuneko dantza eta arte dramatikoko profesionalen kualifikazioa bermatzea.

Urriaren 26ko 1614/2009 Errege Dekretuaren bidez, Hezkuntzari buruzko maiatzaren 3ko 2/2006 Lege Organikoan araututako goi-mailako arte-ikasketak antolatu ziren, eta espazio berezi eta malgu bat eman zitzaion, Goi-mailako Hezkuntzaren Europako Esparruko printzipioekin bat etorritz.

Kontuan hartu behar da arte-ikasketak gero eta garrantzi handiagoa hartzen ari direla gizarte honetan, non profil profesional berriak eskatzen baitira; horretaz gainera, beharrezko ikusten da demanda horri gure autonomia erkideagoaren barruan erantzutea. Horregatik erabaki da goi-mailako arte dramatiko eta dantza eskola bat sortzea, aipatu prestakuntzak eman ahal izateko. Eskola honen sorreraren bidez, osatu eta zabaldu egiten da Euskal Autonomia Erkidegoan arte-ikasketetarako daukagun hezkuntza-eskaintza.

Ikastetxeak sortu, kendu eta aldatzea hezkuntza-administrazioen egitekoa da, hala jasotzen baita Hezkuntza Eskubidea arautzeari buruzko urriaren 3ko 8/1985 Lege Organikoan eta Euskal Eskola Publikoari buruzko otsailaren 19ko 1/1993 Legean.

Bestalde, maiatzaren 14ko 630/2010 Errege Dekretuan, Hezkuntzari buruzko maiatzaren 3ko 2/2006 Lege Organikoan ezarritako arte dramatikoko goi-mailako arte-ikasketen oinarrizko edukia arautzen da; 2. artikuluan esaten denez, ikasketa horiek arte dramatikoko arte-ikasketen goi-mailako ikastetxeetan emango dira.

Maiatzaren 14ko 633/2010 Errege Dekretuan, Hezkuntzari buruzko maiatzaren 3ko 2/2006 Lege Organikoan ezarritako dantzako goi-mailako arte-ikasketen oinarrizko edukia arautzen da; 2. artikuluan esaten denez, ikasketa horiek dantzako arte-ikasketen goi-mailako ikastetxeetan emango dira.

Martxoaren 15eko 303/2010 Errege Dekretuaren 17. artikuluan, goi-mailako arte-ikasketak ematen dituzten ikastetxeek hartu beharreko izendapen generikoak ezartzen dira (303/2010 Errege Dekretua, Hezkuntzari buruzko maiatzaren 3ko 2/2006 Lege Organikoan araututako arte-ikasketak ematen dituzten ikastegientzako gutxieneko baldintzak ezartzen dituena). Halaber, 25. artikuluan, arte dramatikoko goi-mailako irakaskuntzako ikastetxeek bete behar dituzten betekizunak ezartzen dira, eta 23. artikuluan, dantzako goi-mailako arte-irakaskuntzako ikastetxeek bete beharrekoak.

Horren ondorioz, Hezkuntza, Hezkuntza, Hizkuntza Politika eta Kulturako sailburuak proposatuta, eta Gobernu Kontseiluak 2015eko apirilaren 14an egindako bilkuran proposamena aztertu eta onartu ondoren, hau

XEDATZEN DUT:

1. artikulua.– «Dantzerti» Euskadiko Arte Dramatiko eta Dantza Goi Eskola sortzea.

«Dantzerti» sortzen da, Euskadiko Arte Dramatiko eta Dantza Goi Eskola. Eskolaren helbidea: Ibarrekolanda plaza 1, 48015 Bilbao (Bizkaia); kode-zenbakia: 48018956.

2. artikulua.– Funtzionamendua.

Ikastetxea 2015-2016ko ikasturtean jarriko da abian.

3. artikulua.– Helburua.

Goi-mailako arte-ikasketa hauek emango dira:

– Arte dramatikoko ikasketak eta,

– Goi-mailako dantza ikasketak.

4. artikulua.– Espezialitateak.

4.1.– Arte dramatikoko ikasketetan, espezialitate hauek emango dira 2015-2016ko ikasturtean:

– Interpretazioa.

4.2.– Dantzako goi-mailako ikasketetan, espezialitate hauek emango dira 2015-2016ko ikasturtean:

– Koreografia eta Interpretazioa.

AZKEN XEDAPENETATIK LEHENENGOA

Hezkuntza, Unibertsitate eta Ikerketa sailburuari baimena ematen zaio dekretu honetan xedatu-takoak bete eta garatzeko behar diren xedapenak eman ditzan.

AZKEN XEDAPENETATIK BIGARRENA

Dekretu hau Euskal Herriko Agintaritzaren Aldizkarian argitaratu eta biharamunean jarriko da indarrean.

Vitoria-Gasteizen, 2015eko apirilaren 14an.

Lehendakaria,
IÑIGO URKULLU RENTERIA.

Hezkuntza, Hizkuntza Politika eta Kulturako sailburua,
CRISTINA URIARTE TOLEDO.